

欽定剿平三省邪匪方略

欽定剿平三省邪匪方略正編卷三百二十八

壬戌年

七月二十四日

壬辰

額勒登保惠齡奏言荷文明

賊匪經我軍連次剿殺之後所剩不及百人初

八九等日李應貴與副將張廷楷吳廷剛叅將

李應元等各帶兵勇於四龍硎米糧寺紅崖寨

等處分路追捕斬獲十餘人該匪等紛紛四竄

十數人爲一隊數人亦爲一隊皆於山林深密

之處四散躲藏首逆苟文明並無切實下落訊
據獲犯供稱苟文明因官兵搜剿緊急前日夜
間已帶領十幾個人乘夜偷走不知去路我們
因頭人都已逃走也就各自散夥在老林裡躲
藏乘空向別處逃竄等語臣額勒登保以賊匪
既已分散逃遁我軍亦可分投搜捕遂飭令李
應貴張廷楷吳廷剛等挑撥兵勇數十人爲一

隊百餘人亦爲一隊深入山林趕緊搜拏勿任
首逆兔脫乃自初五六日以後霧雨交加晝夜
不止各路兵勇等僉欲擒渠邀賞冒雨剿捕不
遺餘力旋於林箐內先後搜獲賊匪鄭光旺等
十六名訊據供稱苟文明所帶十餘人已先
後散去現只有總兵朱元喬黎鄉約杜小夥李
添祿等四人跟在一處昨日在黃栢扒老林內

遇見今日不知去向等語李應貴等當卽帶兵
赴該處緝拏未見首逆蹤跡次日仍帶領兵勇
於山巔林際逐處搜捕遇有賊匪數十人在林
內藏躲一見官兵卽由溝內飛奔李應貴等帶
兵趕至溝底生擒楊富等五名內有一賊手執
長矛捨命抵拒戮傷兵勇三名官兵等奮力上
前將該匪砍倒訊係矛手李懷玉李應貴等訊

以首逆所在內有左志傑一犯供稱我昨日晚
上在一崖峒邊遇見苟文明他說這幾天受餓
不過叫我們找尋喫食我想到此地步不能自
顧那裡還能顧他遂卽各自走開今被官兵拏
住等語李應貴等卽令該匪引路前往擒拏一
路皆係絕壑窮崖人跡罕到之處官弁兵勇等
附葛攀籐行走五六十里至一崖崗果見有燒

剩木柴一堆而該逆業已他竄李應貴張廷楷
一面帶兵追捕一面將兩次獲犯差人解送軍
營臣以該逆在林內藏躲無處掠食其勢難以
久存若非情急自戕勢必乘間遠遁遂親提匪
犯訊以苟文明究欲往何處逃逸據稱現在官
兵四路截拏苟文明不能出去只聽見他與朱
元裔們說我們若能逃到石泉混過江去再回

四川便有生路了等語查該逆本係四川民人
或欲潛蹤逃回誠未可定臣前已飭令石泉漢
陰地方官於沿江渡口一帶嚴密巡查茲復飛
行傳知該廳縣知照并傳諭該一帶辦寨委員
督率寨民分投查察遇有面生可疑之人卽行
盤詰如能將該逆拏獲卽遵

旨照格獎賞倘有踈縱從嚴治罪是日晚間據探事

弁兵稟報聞得有賊匪七人從老林中竄出向
石泉境內逃走楊遇春聞信卽派令把總劉安
邦帶領精勁兵勇數十人兼程追趕茲據稟報
追至石泉之饒峯將賊匪七人趕上全行拏獲
係荷逆股內零匪訊以荷文明現竄何處據稱
我們係數日前在老林內分散荷文明並未同
行亦併不知伊去向當將獲犯交石泉縣審辦

等情

臣

以賊匪既有竄向石泉者則苟逆欲往

該處竄去之說並非無因近日雨水連綿經旬

未止河流漲發該逆勢不能踣淺過江

臣

現仍

飭令該地方官嚴防江岸及附近州縣寨堡一

體緝拏並令楊遇春督飭李應貴張廷楷等於

磨溝金竹園一帶圍逼黃栢扒老林逐處搜拏

卽期弋獲倘該逆無處奔逃於老林內自斃亦

必尋獲屍身確切查驗不使漏網此外張二張
三股匪以及苟逆前此分竄之張芳苟朝九等
股零匪連日據報有竄至牛欄溝八里坪一帶
者亦有竄至高關峪太平峪一帶者爲數皆不
過百人及數十人副將應元寬遊擊林向榮守
備陳超等各帶兵勇分投剿捕至扎克塔爾所
剿斬土黃等殘匪近據探報初六七等日竄至

盤屋火燒營一帶老林之內扎克塔爾格布舍
楊芳副將張瑗等由佛爺坪三官廟等處分路
進擊慶成帶兵亦至厚畛子截剿所有剿辦情
形尙未報到近日各股賊匪窮蹙奔逃勢多渙
散各林箐內均有自縊而死者連日接據臬司
文需稟報各處查寨委員及地方官等亦均盤
獲一二名至七八名不等臣仍飭令勉力趕辦

俾該匪無從匿跡自更易於肅清至前由寧羌
南竄之宋應伏賊匪一百餘人現據稟報該匪
經慶溥帶兵於二郎壩水田坪一帶探剿未能
西趨初八日逃至城牆崖一帶南竄慶溥派撥
兵勇入林追剿於凍綠橋殺斃賊匪十餘人該
匪竄入南江境內之九角山現在川省總兵許
文謨道員劉清帶領兵勇於南廣一帶防堵

臣

現已飛札飭知該鎮道等探蹤迎擊毋任蔓延
又據西鄉紫陽一帶防剿鎮將及地方文武稟
報初五日有賊匪二三百人由太平西鄉邊界
竄入紫陽之麻柳壩該縣辦寨委員程樹功督
率寨民乘賊無備殲斃四名總兵汪啟聞信帶
兵截剿該匪仍竄回西鄉之銀銅梁星子山而
去訊係楚省剿剩零匪偽總兵黃爾星等爲首

因楚省官兵追剿緊急由大寧邊界竄來又據
防守西鄉一帶之革任總兵楊奎猷副將王福
稟報賊匪於初七日竄至蘆子坪帶兵攔截殲
斃賊匪三十餘名賊匪匿入山林次日探得已
向太平之皮貨舖遠遁等情臣仍飭令該鎮將
等嚴防邊界遇有賊匪竄近務須就地痛殲勿
令深入陝境亦不得以驅逐出境爲了事臣愚

齡昨於界牌石途次遵

旨前赴峪口防剿旋接臣額勒登保來信以善後事

宜亟須籌畫妥辦囑順道赴營晤商隨於十三

日趕至額勒登保軍營謹將所議安置鄉勇事

宜另摺奏請

訓示臣惠齡擬在臣額勒登保軍營聚晤數日將一

切事務籌定後卽從高關夾嶺一路前赴峪口

防範

同日額勒登保惠齡陸有仁奏言查陝省各路防剿鄉勇向來增減無常自前歲秋冬以來

臣

額勒登保因賊勢漸見殘敗行知各路帶兵大員不必再行增添遇有事故缺額亦不必募補現在合計漢南漢北防剿鄉勇共有二萬二千餘名其中除本地民人外川楚民人居其大半

亦間有河南貴州之人該勇等數年以來習於
戰鬪誠如

聖諭總須趁大兵未撤之時先行散遣散遣之後亦

須安置得所

臣

等敢不恪遵

睿訓熟籌妥辦

臣

額勒登保一路所帶鄉勇共有五

千餘名除派令將弁帶赴前敵搜剿外現在營

盤者千餘名

臣

額勒登保連日令楊遇春傳集

各勇諭以軍務業將告竣爾等勞苦數年

皇上深爲憫念恐裁撤之後無所依歸或至流離失
所爾等有愿入伍者愿回籍者悉陳無隱該勇
等環聽之後僉稱賊匪業已平定我等正慮無
處安身回家又無盤費今

皇上有此恩典實我等意想所不到當將孰愿入伍

孰愿回籍逐一註冊

臣

逐加查核愿入伍者十

之二三愿回籍者十之七八可見久役思歸人

情不甚相遠

臣

想一路如是則各路防剿鄉勇

自亦相同查陝西寧陝一鎮所設額兵六千名

除節次募補新兵之外其餘係他處制兵暫時

添補現在尙須招募二千餘名陝西漢中兩處

昨經

臣

等

奏請添設營汛如蒙

允准亦須添兵二千六百餘名如鄉勇中有愿於此
三處食糧者正可就近收伍其或川楚人民愿
於原籍地方食糧卽可歸入川楚官兵隊內次
第補以額缺如無糧缺卽送歸本省就近營汛
驗補是此項愿入營伍之人不難於安頓惟情
愿回籍之人其原籍本有家室產業者有係隻
身無業者此必須分別妥辦查各鄉勇頻年以

來或隨同官兵衝鋒陷敵或不分晝夜偵探巡邏節次傷亡已多勞苦亦屬可憫且該鄉勇等當軍興之始應募者尙覺寥寥除支領鹽菜口糧之外復月給安家銀一二兩不等自臣額勒登保督師入陝以後因各路鄉勇已多應募者不少隨將安家銀兩概行裁去或日給口糧一升月給鹽菜夫價銀一兩三錢不等或月給銀

三兩不給口糧此外別無領項連年以來所得
分例較之兵丁已屬減少當此事竣凱旋之際
自應仰體

聖慈酌予賞賚茲

臣

惠齡與

臣

額勒登保公同籌商

擬將隨同進剿之勇每名賞銀三兩軍功頭人
賞銀四兩其坐卡防剿之勇較之逐日奔走者
尚覺安閒本省民人賞銀一兩川楚之人賞銀

二兩以爲回籍後謀生資本該勇等人數甚衆
固不便沿途押送啟其疑畏之心然亦斷不可
聽其自行散歸以致漫無着落今擬將川楚民
人按一府所屬之內湊集百人或百餘人爲一
起給以凱旋鄉勇紅旗一桿酌派會帶鄉勇熟
諳營員帶領每日按站前進每站會同沿途地
方文武交替護送以資彈壓照應仍按站給予

口食酌備棚廠店房俾資棲息並先期造具清冊二分一咨該原省督撫轉飭該原籍知府查照一交帶領之員按冊點交以免遺漏其所賞銀兩若於起程時卽行散給惟恐該勇等沿途花用到籍後仍復赤手無資今擬按數包封交帶領之員攜帶俟至該勇原籍將清冊交付該地方官會同查點按名將銀兩分給取具該地

方官收管存案該軍回籍之後或歸農或貿易
或仍欲於本地營汎食糧悉聽其便再各勇原
籍多係被賊滋擾之區或恐此時冊內註明有
家而到籍之後又無家可歸全在原籍地方官
妥爲安頓其餘各勇中有既不愿入伍又無籍
可歸者除一體給予賞銀外卽交陝省附近州
縣分別安置各衙署中充當倉夫斗級之類皆

可爲各勇衣食之資該勇等遣散之後如不安
分該地方官自當嚴辦示懲倘地方官按名收
到後漫不經心以致出而滋事則將該地方官
分別記過劾叅至各勇中之貴州民人有情愿
回籍者人數無多不必派員護送現在軍營有
貴州官兵俟凱旋之時即可給予賞資隨隊回
籍此外臣額勒登保及楊遇奎官慶成穆克登布

尙帶有新勇共千餘名皆係連年來賊夥中投
出効力之人亦卽照裁撤鄉勇之例送回原籍
安插如此則人人皆有歸著旣可以示體恤復
可以杜後患所有各該勇刀矛器械俟遣令起
程時一律收繳再各勇中一年以來拔補大小
官職者甚多尙有蒙

恩賞翎並五六七八品軍功頂戴者爲數不少

臣等

除現已查核勞績業將軍功冠大靖等三十餘
人拔補千把外委等官給委咨部註冊外其餘
因軍營所出弁缺不敷拔補應詢明情愿做官
者咨明該省督撫酌量補用不愿做官者皆繕
給軍功執照俾令頂戴榮身再各路隨征鄉勇
因師行緊急尙有因病落後以及差赴各處探
信日久未回之人_臣等已飭令地方官出示曉

諭令其卽赴營盤歸隊聽候遣回倘有在各處
任意逗遛以及滋生事端者卽令營汛寨堡等
一律緝拏送交本管道府分別嚴辦臣等現在
籌議大畧如此其川楚兩省本地民人居多辦
理自有不同臣等現已將陝省籌辦情形寄知

德楞泰勒保吳熊光自能各按情形斟酌妥辦
總之安置鄉勇係善後第一要務臣等惟當仰

體

聖懷慎重辦理斷不敢稍存忽畧之見

臣

陸有仁現

在漢中所有漢南一帶防剿鄉勇可以就近查

辦但邊疆遼濶營卡甚多必須專派大員周歷

各營逐處清理茲酌派陝安道朱勲會同副將

王兆夢卽赴漢南一帶各營卡一律造冊查辦

該道隨

臣

額勒登保軍營總理糧餉兩載有餘

人極幹練可靠凡有交辦事件均能實力實心
且漢中興安一帶係伊管轄地方該道素愜輿
情自能辦理妥協奏入

上命軍機大臣傳諭額勒登保惠齡曰苟文明一犯
僅帶四人潛逃窮蹙已極額勒登保應卽督飭鎮
將上緊搜拏務得首逆下落不可又令竄回川省
前經諭令額勒登保將該匪轟出山外逼向西南

可以大加剿殺如果該逆率領多人軼出山外官兵轉得痛加截剿斷不因此歸咎額勒登保辦理不善今苟逆止帶同四人潛逃若又任其出山他竄實太不成事體苟逆一股本係四川之賊因額勒登保不能將陝省邊界防範嚴密以致該逆由川竄甘入陝盤踞老林半年有餘老師糜餉額勒登保統領數萬之衆專辦此股首逆圍剿至今若

仍不能將該首逆擒獲任令隻身逃去復竄川省
額勒登保尙有何顏朕實不能再爲曲貸矣此時
賊匪殘敗之餘所注意者惟在首逆若將該犯生
擒正法最爲妥善倘不能生獲或臨陣殲斃或該
逆畏懼自戕必須確切查驗認取屍身方可憑信
額勒登保果趕緊將該逆辦竣則捷報到時仍當
加以恩獎也至摺內稱有賊匪七人從老林竄往

石泉可見苟逆欲由石泉竄川之說不爲無因等語該逆果欲由石泉竄川必由漢江經過所有沿江卡隘關係緊要該一帶既經額勒登保等派有鎮將等分段堵禦並令地方官協力巡防此時尤當嚴飭該文武等慎之又慎現在雨水連綿河流漲發該匪等雖無可踣淺之處但賊蹤狡獪異常應飭令該地方官隨時防範預將船隻提泊南岸

爲要設稍有疎虞致苟逆隻身脫逃則防堵之員
必當嚴叅治罪額勒登保等不能督飭之咎亦更
難解免矣至額勒登保前因在陝督辦軍務是以
將伊補授西安將軍一切呼應較靈但伊向來在
京當差已久朕原擬大功告成後仍令伊回京供
職故未將伊領侍衛內大臣等缺簡放他人現在
陝省軍務不日告竣額勒登保前曾具摺懇辭西

安將軍茲已將興奎補放並令其馳驛前往興奎
與額勒登保素爲熟識朕看其人尙明白從前雖
曾歷戎行而於此次軍務並未經手到陝後額勒
登保當將一切應辦之事詳細告知並令其同駐
軍營俾資熟習此時苟逆卽可成擒但辦竣後陝
省餘匪尙有張二張三靳士黃等零星奔竄總須
額勒登保一手督辦未便急於回京卽飭送安插

鄉勇一節爲善後第一緊要事宜亦須額勒登保
在彼會同督撫熟籌妥辦現據額勒登保等奏稱
該處存營鄉勇連日令楊遇春傳集曉諭所辦甚
是楊遇春在陝最得軍民之心今令其面宣恩諭
鄉勇等自必鼓舞樂從至據奏鄉勇中有情愿入
伍者不難安頓其情愿回籍之人有本有家室產
業者有隻身無業者均分別賞給銀兩並令奏集

百餘人爲一隊酌派會帶鄉勇之熟諳營員帶領
會同地方文武官護送回籍等語皆非易辦之事
鄉勇家有產業者不但回籍後可以各安生計卽
沿途行走亦不虞其滋事惟隻身無籍之徒好勇
鬪狠者居多况應募以來習見軍營打仗之事性
更難馴今雖酌給銀兩送令回籍難保其沿途皆
能安靜行走所有帶領之員最關緊要設所委非

八鄉再等途中不遵約束或有滋擾地方等事若
置之不問則伊等更無所顧忌若加以懲辦操之
太蹙或仍不免激成事端是護送之員轉不必職
分過大亦不必論文武惟在其人平素歷練曉事
又能得鄉勇之心者方足以資駕馭著額勒登保
遴委妥員派令護送卽副叅等員亦勿輕派並不
必專派武職也至回籍後如何安置各令得所之

處已諭知川楚陝三省督撫並著抄寄額勒登保
閱看查明各路軍營鄉勇除籍隸川楚陝三省外
其餘凡有鄉勇原籍省分一併抄寄該督撫一體
遵辦至所稱各該勇刀矛器械俟遣令起程時一
律收繳等語此事亦不易辦鄉勇等所用器械如
係官爲頒給有冊檔可稽者此時遣令回籍自當
各令繳還若係伊等自置之物必一一勅令繳出

鄉勇或稱攜帶防身勢難相強且轉示以防閑之
跡額勒登保於收繳器械時務須不露聲色酌量
查收使鄉勇等不致心生疑懼方爲妥善至收繳
時斷不可假手胥吏長隨若輩惟利是圖難保不
從中勒索將實在必應呈繳之器械得財賣放而
於不必收繳者或因需索不遂多方刁蹬轉不足
以安鄉勇之心總之鄉勇一項原不應用今旣用

之七年亦非一時所能散置得所惟在額勒登保等酌籌盡善妥爲辦理

額勒登保又奏言

臣

接陸有仁來信及各路稟

到宋應伏殘匪一百餘人竄入寧羌後慶溥帶兵由二郎壩水田坪一帶追剿該匪未敢西竄從乾溝紙房壩一帶奔逃係總兵永明專轄之地慶溥仍帶兵由元壩子一帶跟剿知會永明

探蹤迎擊旋據探報永明於初八日從大石埡
帶兵數百名趕至廟壩賊匪是日已繞路竄過
城牆崖一帶慶薄復督飭外委季發春入林跟
追於凍綠場等處殺賊十餘名該匪逃至綿繩
溝連夜竄入南江境內等因臣查賊匪所竄之
綿繩溝陡壑密林向無路徑本未設卡安兵該
處西距城牆崖八十餘里距東路之廟壩六十

里該鎮帶兵趕到廟壩雖次日帶兵趕往而該
匪已乘夜竄入川境是該鎮雖未株守營卡然
未能擒殺賊匪一名實屬不合未便以大功垂
成稍爲姑息應請

旨將總兵永明拔去花翎仍念其帶兵數載尙有微
勞懇

恩降三級以遊擊補用飭令嚴防邊界倘堵剿再有

不力卽行嚴叅治罪再臣前奉

旨提督慶成於上年九月間丁伊父憂因軍務緊
要仍留原任俟陝省大局辦竣令其回家穿孝其
提督事務彼時著額勒登保酌量或卽將楊遇春
奏明署理亦可等因欽此臣查刻下陝境南山一
帶雖未肅清但殘匪無多不日自可掃蕩慶成
丁憂已將一載自應欽遵

諭旨卽令回京穿孝所遺陝西提督事務奉

旨以楊遇春署理查楊遇春連年帶兵勞績素著久
在

聖明洞鑒之中

臣

自苗疆督師以來卽委該提督總

理軍營翼長不特分路剿賊出力最多卽一切

營務事宜亦皆相助爲理前此賊勢鴟張之際

臣

分派楊遇春帶兵進剿賊輒望風而靡陝省

境內通省軍民無不共相愛戴實係臣數年以

來得力可靠之人刻下軍務將次告竣地方彈

壓固須得人舉凡清查官兵安插鄉勇善後各

事甚屬紛繁尤須幫同臣熟籌妥辦甘州固屬

邊陲要缺但係無事地方該提督身任大員年

力富強不敢遽圖自逸合無恭懇

皇上天恩將陝西提督一缺卽以楊遇春調補實於

地方有裨

臣

更得收指臂之效所遺甘州提督

一缺伏查穆克登布向隨

臣

一路帶兵剿賊甚

爲勇往自在平利安康一帶防剿以來川楚賊

匪不能闌入該處民人甚爲感戴又副都統慶

溥頻年屢著勤勞曾任湖南副將民苗悅服嗣

復擢陞總兵諳練營伍所有甘州提督一缺可

否懇

恩於該二員內揀選一人簡放之處出自

聖裁奏入

上諭內閣曰總兵永明前此疎防宋逆股匪由川省
竄至寧羌關口壩經額勒登保查奏因念彼時患
病屬實加恩免議今該匪復從紙房壩綿纏溝一
帶奔竄回川永明雖帶兵前往並未能趕剿仍任
竄逸咎無可辭永明著拔去花翎降爲都司留營

効力倘再不實心堵剿致有疎虞必當從重治罪
上又諭內閣曰慶成於上年九月間丁父憂後將及
一載因軍務緊要降旨仍留提督之任帶兵剿賊
茲據額勒登保奏報現在陝境南山一帶剿敗殘
匪已屬無多不日掃蕩慶成自可無庸留陝協剿
著准其回旗成服守制所遺固原提督員缺著楊
遇春調補穆克登布著補授甘州提督所遺湖南

永州鎮總兵員缺著慶溥補授

同日

上命軍機大臣傳諭四川陝甘湖北各督撫曰辦理
教匪軍務將次告竣所有善後事宜惟安頓鄉勇
一節爲最要亦惟此事爲最難現已諭令額勒登
保趁大兵未撤之先分別妥辦其愿入伍者聽其
入伍愿回本籍者賞給路費專派曉諭事體文武

員弁分投帶領護送回籍除沿途經過地方各督撫務飭令妥協照料外至到籍之後則全在本籍地方官留心撫馭處置得宜此內如原籍本有家室產業之人久役思歸各安生理不難管轄若本係隻身無業之人隨營日久習於戰鬪今乍歸鄉里衣食無資難保其不流而爲匪地方牧令如一味姑容則伊等習久玩生必至目無法紀不聽約

東若有意從嚴一味操切則伊等自以從征數年
著有微勞且其中有賞給軍功頂戴者乃地方官
防閑過甚轉不得與平民無事者等亦失駕馭撫
綏之道惟在該督撫詳切訓誡地方官令其酌量
情形或挑充雜役畀以衣食之資間有不安本分
滋事者亦須因事示儆消其桀驁之氣懲一而不
及衆總期示以大公恩威並用寬嚴得中使其常

散而不能常聚如此隨時化導俾伊等知感知畏
則歲月之間皆爲良民矣其州縣中有關茸無能
不善經理者或量爲更調或另委道府大員董司
其事此乃地方最關重大之務各督撫等其悉心
籌辦以副委任毋忽

欽定剿平三省邪匪方略正編卷三百二十九

壬戌年

七月二十六日

甲午

額勒登保惠齡奏查首逆

苟文明率領夥黨藏匿黃栢扒地方該處老林

縱橫二三百里連日雨霧迷漫官兵逐處搜捕

備極艱辛

臣

以該匪人數無多惟恐稍縱卽逝

令楊遇春同侍衛傅陞達沖阿等帶領馬步官

兵於林外分投圍逼並令總兵李應貴副將張

廷楷叅將李應元等挑撥精勁兵勇或七八十人或四五十人各爲一隊由磨溝金竹園巖屋河分路入林搜捕山內土性鬆浮又值久雨賊匪竄過處所必有腳跡可尋隨傳令各兵勇等踣蹤追捕據各路兵勇於林內先後搜獲胡大秀劉昆謝四麻子等十八人皆解送臣軍營訊明正法十七日午後李應貴等帶領兵勇翻越

山林旋搜旋進至下麻溝瞥見賊匪二人在林
內藏躲該匪見有兵到將手攜包穀拋棄亡命
疾逃兵勇等趕上拿獲訊以首逆苟文明現在
何處據稱苟文明與衆人分散在山巔樹林內
藏躲畏懼官兵一時不敢向別處逃去林內又
無糧食都已餓了數日前日我們營裏的黨先
鋒在前百花石巖一帶搜得百姓窖藏包穀兩

聞通知衆人趕快分搶糧食隔了半日苟文明
同杜小鰲們七八人也從山上下來我聽見苟
文明說我們今日所得糧食可以喫得三四天
現在官兵在老林裏搜殺我們斷難存身你們
有情願回川的明日各自尋路逃到石泉一帶
都在江邊上會合偷渡過江便有生路等供李
應貴訊問確實遂同副將張廷楷吳廷剛叅將

李應元特以順保張超遊擊王兆龍祝廷彪黎
炳謝天瑞等分帶兵勇飛抵花石巖下望見山
上起有火煙知賊匪尚未他竄惟天色傍晚雨
勢愈密李應賁張廷楷等密告兵勇以苟文明
現在山上爾等辛苦多時成功在此一舉務須
努力向前擒縛苟逆官弁兵勇等均各奮勇撲
上山梁賊匪倚恃山險路滑持矛下壓藍翎軍

功王爾順鄉勇陳富粹中賊矛陣亡兵勇帶傷
數名我軍愈加憤恨竭力仰攻守備丁永安把
總張必祿藍翎馬兵楊貴等亦奮力仰攻數路
兵勇一擁上山志殺賊匪數名該匪敗潰鄉勇
內有素識苟逆之人指引官兵沿山追趕該首
逆自知不能倖免遂跳下懸崖兵勇等繞路趕
至崖下見該匪腰背跌傷微有氣息衆兵勇皆

欲爭功卽將該逆登時亂矛戳斃梟取首級此外各兵勇共殲斃賊匪二十餘人生擒陳彬等十四名楊遇春聞信亦卽由林外趕到將苟文明首級令鄉勇及獲犯指認確切遂同賊犯一併解送軍營臣等驗得該逆年約四十餘歲瘦面微鬚右額有火燒疤痕一大塊右眼角有大豆肉痣一顆近因畏懼官兵將鬚剃去與節次

獲犯所供年貌相符

臣

營中亦有賊營投出熟

識苟逆之人令其隔別辨認均稱的係該逆無

疑

臣

等查首逆苟文明係與川省逆犯羅其清

冉文儔等一同起事連年以來於川陝楚三省

邊界輾轉奔逃肆行擄掠抗拒官兵今歲經

臣

督率數路官兵疊次剿殺該匪勢極敗殘而因

獸猶闖尚敢於大山密林往來奔逃以爲延喘

之計實屬罪大惡極茲幸仰仗

聖主威福得以臨陣殲除可見此等叛逆之徒斷不能倖逃

國法實足大快人心

臣

等現飭將該逆屍身剝骨

揚灰將首級解回原籍巴州懸示以洩衆憤所擒陳彬等十四名均係積年陳賊概行正法數月以來官弁兵勇於山林中輾轉追剿實皆勞

苦現於

欽頒賞項內撥銀三千兩先行分賞弁兵鄉勇以示
獎勵其餘出力員弁兵勇容俟秉公查明再行
奏懇

恩施至

臣

額勒登保前此欽奉

諭旨俟苟逆殲擒後酌量情形或仍督兵在彼搜捕
餘匪或卽帶兵前赴平利一帶堵截楚省竄匪總

在額勒登保相機而行。因欽此茲查苟逆雖已
授首餘黨猶未盡除此外尚有張士雲靳士黃
等殘匪均須趁此兵威分投殲洗且川楚零匪
近無竄陝信息

臣

額勒登保自應仍在南山一

帶督率楊遇春扎克塔爾等上緊剿洗現於拜
摺後前赴洵陽壩將兵力稍爲整頓卽移師四
畝地柴家關一帶酌量情形分投趕辦設使楚

匪有竄陝信息仍可分督官兵前往截擊

臣惠

齡遵

旨馳赴峪口一帶設法堵剿並督率辦寨委員搜捕
零匪奏入

上諭內閣曰本日至避暑山莊甫經下馬卽得額勒
登保等遞到六百里加緊奏報官兵殲斃首逆苟
文明擒斬餘黨卡喜捷音此皆

上天垂恩

皇考賜佑欣慰之餘翻增感涕秋彌大典爲我朝

家法相傳所以肄武習勞懷柔藩部者意至深遠我

皇考臨御六十餘年於木蘭行圍之先

駐蹕避暑山莊歲以爲常敕幾勤政之暇款洽蒙古外

藩垂爲令典是避暑山莊實爲

皇祖

皇考在天靈爽式憑之地朕祇承

鴻緒不敢稍自暇逸特於今秋涓吉啟鑾舉行秋獮實
本繼

志之誠若以山莊爲從事游覽則京師官觀池籞豈不
較此間更爲清適而必跋涉道途衝履泥淖遠臨
駐蹕乎朕之敬遵

成法不敢偷安必欲前來山莊之忱悃

皇考實鑒臨之是以清蹕_纔停捷書已至

眷佑所昭如響斯應朕披覽奏函瞻依

居處不覺聲淚俱下召見軍機大臣時至於哽咽不能

宣旨此實至情所感不能自己當命軍機大臣將

此摺遍示內外王公滿漢諸臣亦莫不額手稱慶

彼止朕此行之漢員適見其愚懵不曉事耳至苟

文明爲積久著名首逆與羅其清冉文偉等一同

起事頻年以來在川陝楚三省地方輾轉奔逃肆
意擄掠實爲罪大惡極經額勒登保督率官兵屢
次剿殺勢極窮蹙而尙於大山密林內潛匿四竄
希圖免脫又復數月今在花石巖地方經官兵四
路搜逼立時戮斃斬級梟示並將餘匪盡數殲除
皆由額勒登保調度得宜所致雖辦理稍覺遲延
而首逆終就殄滅實不愧經畧之任殊覺可嘉邪

匪起事各首逆俱已陸續辦淨祇餘苟文明一犯
今該逆復經殲斃是積年著名巨惡業已悉數掃
蕩其零星奔竄之蒲添寶等祇係近日攢聚殘匪
爲首之犯且爲數無多現行叅贊德楞泰等督兵
搜捕成功大局已得十之八九額勒登保著加恩
晉封爲一等伯賞還雙眼花翎並賞給四喜玉搬
指一個玉翎管一個鑲玉帶鉤一副黃辦珊瑚豆

大荷包一對小荷包四個俟陝省零匪全數肅清
再加恩賚提督楊遇春雖係事後趕到而督率搜
剿亦屬勤奮著交部議敘其奮勇出力硃筆圈出
之李應貴張廷楷吳廷剛李應元特依順保張超
王兆龍祝廷彪黎炳謝天瑞丁永安張必祿藍翎
馬兵楊貴等或應加陞一等或應交部議敘或應
賞戴翎枝著額勒登保等分別等第開單保奏其

餘如尙有出力人員亦著額勒登保一併查明具
奏候朕加恩並發去青玉搬指十個鼻煙壺十個
大荷包五對小荷包十個分賞出力員弁一兩重
銀牌二百面五錢重銀牌二百面分賞出力兵勇
以示獎勵

同日

上命軍機大臣傳諭額勒登保曰本日甫至山莊適

據額勒登保等奏殲斃首逆苟文明並擒斬餘匪
一摺覽奏欣慰已片降諭旨將額勒登保晉封爲
一等伯並將事出力員弁等普加恩賞矣苟文
明一犯竄入南山剿辦雖覺遲延今已就殲戮積
年首逆俱已殄滅無遺據摺內稱現在陝省竄匪
止有張二張三靳士黃等尙須搜剿額勒登保督
率楊遇春扎克塔爾等前往南山一帶分投搜捕

正與朕昨降諭旨相合陝省竄匪總須額勒登保
一手剿淨惟當趁此兵威勝勢迅速搜剿廓清全
境若能於月內將張靳等逆悉數殄除固屬甚善
倘月內未能辦竣務於八月中一併掃蕩俟捷音
奏到時再加恩賚再此次兵勇等戮斃苟逆究係
何人首先用矛向戮著額勒登保查明具奏其持
矛下壓猝中賊矛陣亡之軍功王爾順鄉勇陳富

著咨部賜卹此時惠齡已馳赴峪口一帶設法堵剿南山餘匪務須嚴密布置勿令竄出峪外俾額勒登保等得以就地搜剿淨盡並幫同額勒登保將安插鄉勇等一切善後事宜悉心籌辦諸臻妥協爲要

二十七日乙未德楞泰奏言竊臣前在扇子壩將

蒲逆轟逼出山向西南狂奔臣仍卽督兵由沿

渡坪向紫竹灣一路抄赴彎腰樹過其北竄陝境之路派令色爾滾蒲尙佐由溫水河魏家溝

緊躡賊蹤初十日

臣

抵彎腰樹據報賊探離此

不遠正與官兵哨探相值一見卽行折回而逃

等語其時賽冲阿長齡溫春富瀚馬瑜等帶領

馬步兵勇飛馳趕剿

臣

督同富僧德都當阿副

將馬應國叅將馬文斌等繼進追至二十餘里

之桐木園地方趕上賊匪殺賊十餘名生擒會
省吾等七名時色爾滾蒲尙佐等亦帶兵西來
兩路兵勇趕殺賊衆盡向南面翻天地埡老山
亡命紛逃被步行兵勇追入老林殺賊三四十
名生擒周茂發等二十八名直追至廟嶺子餘
匪又向陰裕河鑽入老林遁去色爾滾蒲尙佐
等仍卽緊躡賊蹤臣同賽沖阿長齡溫春富翰

富僧德都富阿馬瑜等由北面抄截旋探賊衆
由陰裕河又向東南之大黃溪小黃溪有竄川
楚界上廟堂河奔逃之勢該處一帶盡係老山
菁林路徑險窄其勢似欲竄川又飛飭前派在
大寧巫山邊界堵截之副都統達勒精阿武隆
阿總兵張績等各帶兵勇隨時探迎截剿
臣遂
由老渡口順水溪緊顧北面惟自十一日起大

雨如注日夜不止我兵冒雨前進十三日趕抵
龍洞河因各溪泛漲滙流於此河寬水深波浪
洶湧次日砍伐樹木設法架搭浮橋人不能立
足日夜焦灼無可如何直至十五日半夜雨止

十六日水漲暫退數尺

臣

卽令趕搭浮橋挽渡

十七日我兵均已齊抵堆子場因恐川境達勒
精阿武隆阿張績等或向他處追剿賊匪無兵

迎截遂令色爾滾蒲尙佐等帶兵由相思嶺西

北面遏截

臣

督兵直趨巴東之陳家坡顧其東

折之路現探蒲逆在巴東之天生橋地方又與

白號張阮二姓賊匪三四百人合夥共計千餘

人必須就地掃除方可移兵他往十五日又接

據總兵吉林泰稟報六月二十七日探得一股

賊匪四五百人由馬良坪折竄浪蕩河東湖之

黃家場一帶當派鄉勇首領候補把總黃興隆
把總黃成文向元龍帶鄉勇二百名躡尾追剿
該鎮帶馬步兵勇敢道新坪抄截二十九日趕
抵新坪據黃興隆稟報二十八日賊由新坪折
轉至長嶺岡紮營勢甚散漫該把總等卽在樹
林內藏匿待至三更時乘其睡熟率領鄉勇圍
住房屋一所約有賊百餘人喊吶砍殺其餘各

處匪衆自相驚潰踐踏亦有戮傷者均向西而
逃因黑夜兵單未敢窮追當繳耳級六十八副
活賊二十三名訊據活賊供稱此股賊內是老
黃號李老四同趙徐兩個總兵聚有二百人
其餘都是擄來的人等語當卽正法初一日正
擬跟蹤前進探報該逆有走白馬灘茅壩向歸
州興山之勢已有總兵李天林帶兵尾追而去

該鎮以賊匪四五百人除擒殺渙散外只剩三百餘人既有李天林緊跟剿辦而南漳遠安界上尙有賊匪三四百人應顧及東面爲要卽就近向霧渡河西北口荷花店一帶探蹤截剿又詢據巴東之太平寨寨長李興才稟稱六月二十八日有麻守備帶兵在羅家溝將唐明萬一股賊匪乘夜圍捕殺死二十餘人拿了四十多

八七月初二日夜間在柳樹灣又去犯白號張家的賊匪殺了二十餘人拿了三十多人搶得馬騾十四匹頭矛子狼筈初四日起營押解向平陽壩去了等語

臣

查藍翎守備麻光裕係施

南府人該員所帶鄉勇數百名均係本籍佃戶

隨征日久極爲奮勇前經

臣

與吳熊光保陞都

司時

臣

以各逆剿殘零散見大兵卽逃遁無蹤

是以令該員將所帶鄉勇改裝執打賊旗並派
臣營中雲南守備周允泰協同前往邊界各老
林內遍處搜捕茲據寨長等所供情形確鑿尙
未據麻光裕稟到諒亦因水漲所阻再查麻光
裕所剿白號張阮二姓之賊已與蒲逆合夥唐
明萬一股日久未得確蹤至今只有四百餘人
賴大有熊二娃賊股此時亦只五六百人吉林

泰所追南漳遠安之賊不過三四百名或係崔
胡戴四亦未可知李天林所追歸州之賊亦只
三四百名是官兵近日各路分投截剿賊黨口
漸渙散較前更爲衰敗惟各逆自知滅亡在即
無不見兵卽逃日夜狂奔希圖苟延殘喘臣惟
有趁此秋令涼爽之際督飭各鎮將鼓勵兵勇
竭力分投趕辦以期迅速掃蕩廓清斷不敢以

賊衰稍爲鬆勁上負

主恩再臣欽奉六月二十五日

上諭以軍務將次告竣酌籌善後事宜鄉勇一節最

關緊要令臣等將現在情形悉心酌議等因查鄉

勇之設起自臺灣嗣後湖南貴州及此次教匪

滋事均有招募者推原其故緣逆匪起事人數

本屬無多必以焚殺擄掠始可逼脅良善而百

姓畏其克鋒殘害相率從者日以千百計烏合

日增勢遂鴟張

臣

曾經出師臺灣該處一府三

縣兩廳當鳳山彰化失陷諸羅被圍除府城及

淡水鹿仔港外其餘百姓多爲賊匪逼脅入夥

卽有百姓約聚鄰里壯丁自相護衛殺賊者遂

有義民之稱迨招撫舉行設法解散其中有子

弟從賊而父兄爲義民者其意以兵勝則子弟

有所歸無非爲保全身家之計並非甘心從逆
是以連次痛剿後大兵所到之處相率投歸者
絡繹不絕故數月間卽廓清竣事湖南貴州苗
民亦然至此次教匪不法其時英善宜綿因賊
氛猖獗到處蹂躪彼時寨洞稀少被難良民多
無容身之地勢恐去而從賊更爲失計且東鄉
通江儀隴巴州南江五州縣先後失陷民心驚

惶莫措城守空虛扼要卡隘均須兵力堵截故
招募鄉勇令其設卡防禦既爲安置難民不致
從賊又可藉民力以資捍衛其有隨征鄉勇不
過道路熟諳協助軍聲實非仗之攻堅破敵是
以元二年間川省應募者卽有三十七萬之多
故全川得以保護陝楚兩省招撫者諒亦不少
追賊匪被剿敗竄四散狂奔其有兵力所不敷

分顧防範者如陝之漢江川之嘉陵江楚之鄖
西並三省邊界近山各屬賊股往來窺伺其城
守卡隘臺站實無如許多兵分佈又不得不濫
鄉勇以爲協護然此皆就本地居民充當並非
無業之徒故用之以禦賊者卽使之自衛身家
又可制其從賊之心其中雖有流民不過十之
一二其隨征者藉本地之人爲之哨探嚮導故

進剿抄截較爲便捷蓋鄉勇雖有勇敢之氣兵
勝則助勢跟追擒殺若遇克悍對敵非馬步勁
旅直前攻搶或分路抄截不但不能取勝每致
失機愼事皆門不諳紀律不知進止是以殊不
可靠故勒保接辦軍務以來陸續裁汰已去三
十五六萬偶有一二不法之徒該地方官隨時

查拿

臣

與勒保先後

奏明正法嚴辦至今帖然無事卽陝楚裁減者亦
自不少此歷年來臣之所經歷親閱情形也現

在三省征防鄉勇如經畧額勒登保統率之楊
遇春慶成扎克塔爾穆克登布慶溥李應貴喜
明及通判維昂等各路隨征鄉勇六千九百餘
名此時諒又減少楚省如長齡統領之孫清元
吉林泰德昌李天林等各路現在隨征鄉勇四

千六百名此內有二竹房縣有業百姓二千五百名其無業者亦有二千一百餘人川省如

臣

一路及勒保達勒精阿武隆阿達斯呼爾岱薛大烈張續田朝貴叅將桂涵遊擊羅思舉等各路現在隨征鄉勇共五千五百餘名又建昌道劉清所帶鄉勇並招撫投首報効者四五百名統計川陝楚隨征鄉勇共有一萬七千數百名

此係將來事竣均須安插辦理者至於叛產一項歷年來陸續投首並臨敵拿獲被脅未久難民遞回原籍者仍遵

旨賞還執照外所剩諒已有限斷不敷此項鄉勇之
用其防江守城堵卡者三省約共不及二萬人
概係本地有業百姓充當實與團練無異事竣
後不過收繳器械並優給賞資以資復業如楚

省知府尹英國管帶施南府鄉勇二千五百名
因賊匪所剩無幾官兵足敷剿辦是以臣前與
吳熊光商酌已奏請裁撤量加獎賞仍令尹英
圖帶回本籍安置查三省防江守城堵卡各鄉
勇俱係本處有業之民人故情願入伍者少其
隨征打仗者多係無業遊民到處爲家以之入
伍自是欣然樂從因查三省現添營制陝省寧

陝鎮增兵六千名尙有提標應增兵額楚省增兵三千五百名川省亦增兵千名合計共增兵額一萬餘名其三省隨征鄉勇內尙有有業可歸者約有十之二三無業者亦不出一萬上下按照額兵之數足敷添補設或人浮於缺卽可作爲新兵暫散於各營以束其身俟有額缺揆補如有怠玩不遵約束者仍隨時零星裁革斷

不致別滋事端或其中亦有藝業不願入伍者
聽其自便仍當優加賞資遣散回籍交地方官
妥爲安插但陝省隨征鄉勇半係川省游民卽
楚省亦有川民數百合之本省各路隨征者六
千餘名是川省人數實多而川省所添兵額不
及一千此中辦理稍費周章臣近接額勒登保
來信俟苟逆辦竣卽移師南來平利查平利二

竹係三省適中之地斯時大局底定不過分兵
搜捕零匪

臣

與勒保惠齡吳熊光均可就近會

合先將鄉勇一項悉心籌計是否三省通融辦
理抑或另應設法之處總期遣散之後各得其
所使其帖然寧謐然後再撤官兵方爲萬全並
可將善後一切應辦事宜一併會商妥協至鄉
勇中現有頂戴者應行分別或量材錄用或頂

戴榮身及整頓營伍訓練額兵等事統俟會合時逐一詳晰妥議具

奏奏入

上命軍機大臣傳諭德楞泰曰蒲逆股匪被剿奔逃此次在彎腰樹地方經德楞泰督兵遏其北竄之路並又分兵抄擊該匪始行折回不敢竄入陝境但仍未能卽時擒戮復竄向邊界與張阮二姓賊

匪合夥此時德楞泰惟當注意蒲逆督率官兵奮力追躡迅速剿除況訊據獲賊供稱並無騾馬是該逆等祇係徒步逃竄即使行走迅捷豈有官兵乘騎不能趕上之理卽如此次德楞泰等於十三日趕抵龍洞河因連日大雨爲溪漲所阻趕搭浮橋至十七日始得過河前進遲逾已閱四日蒲逆因得與張阮股匪會合可見稍緩須臾卽已別滋

糾約七年以來各路總墮此病如七十五不緊追
苟逆直蔓延至今日汝寧不知耶德榜泰總當緊
躡賊蹤俾無片刻停留方可一鼓集事昨據額勒
登保奏業將首逆苟文明殲斃祇餘零星殘匪不
難卽日廓清是以加恩將額勒登保晉封一等伯
並賞還雙眼花翎而川境零匪節經該省官兵分
投搜剿所剩無幾業據勒保奏稱於七月內總可

辦淨是川陝二省軍務均可剋期告竣惟楚省蒲
逆等匪尙延殘喘額勒登保辦完南山餘匪後自
必帶領勝兵前來楚境幫同剿辦但德楞泰係屬
叅贊聲威素著入楚以後業將巨寇陸續殲除豈
於此零星後起之賊尙待經畧到彼始克奏績乎
德楞泰此時或用剿撫兼施之法出示曉諭以教
匪起事七年以來所有著名首逆俱經官兵以次

斬擒卽如近日楚省首逆樊人傑曾芝秀王國賢
等無不悉就誅夷皆爾等所知積年首惡祇剩苟
文明一犯今又被經畧督兵殲斃老教匪徒已無
噍類現在川陝二省賊匪悉數掃除爾等伎倆斷
不能如老教之克狡更難倖免偷生且俱係近來
收拾敗殘後起之賊其滋擾地方之罪亦較之老
教爲輕我皇上如天好生憐憫爾等愚頑誤投陷

非是以屢降恩旨凡有悔罪自新者概予寬宥爾
等何苦執迷不悟甘蹈刑誅莫若及早回心多投
出一人卽多活一人之命早投出一日卽早遂一
日之生若經此次曉諭之後仍不自知改悔妄思
免脫一經官兵擒捕卽當殲戮無遺萬無苟免之
理生死所關急當猛省如此剴切曉諭賊匪等知
有生理相率來投豈不較爲省事但此爲一時權

宜一向出示一面仍當奮勇搜剿不可稍有鬆勁
並著飭催孫清元吉林泰等將賴熊崔胡等逆趕
緊剿除毋許稍有舐延總當於八月內將楚境一
律肅清速覈大功再膺懋賞勉之望之又另據獲
奏安插鄉勇一摺所論皆是國家以兵衛民鄉勇
名目原不應有自臺灣用兵時始有招募鄉勇之
事以後湖南貴州等處相率沿用至川陝楚三省

剿捕邪匪愈用愈多視同額設殊不知臺灣初用鄉勇時數本無多易於遣散且該處一府三縣孤懸海外勢亦不能他往至此時鄉勇之數較前不啻倍蓰且係各省之人卽如本日總楞泰摺稱隨征鄉勇共有一萬七千餘名伊等數年以來習於戰鬪且隨官兵往來追賊熟習道路三省地方遼瀋州縣毗連將來事竣之後若不安爲安插任其

分散可慮之處殆難勝言且各省地方民人有一
家之內子弟從賊而父兄卽當鄉勇如川省鮮大
川身爲首逆而前此殲斃診犯時卽係伊同族之
鮮文芳鮮文屏等伊等充當鄉勇之時乘官兵聲
勢莫敢報復迨事定歸鄉卽恐不免開仇殺之釁
種種事端由此而起豈可不先事預籌全在地方
官安置得宜相安無事昨據額勒登保等奏到籌

辦鄉勇一事請分別情願入伍情願回籍及有業無業者酌量加恩散遣並派員護送設法將器械收繳等語已降旨詳悉諭知額勒登保等會同德楞泰及各督撫熟籌妥辦德楞泰摺內所云將情願入伍之人散於各營挨次補額此外不願入伍者聽其自便仍當屢加賞賚等語與陝省所議相同自應如此辦理但回籍之後總必須責成地方

官處置得宜留心撫馭始爲周安至將來遣散之
後各處鄉勇帖然寧謐然後再撤官兵此語甚是
亦與朕節降諭旨符合又摺內稱川省隨征鄉勇
人數衆多而所添兵額不及一千辦理稍費周章
將來分撥入伍時是否三省可以通融補額抑或
另有設法之處並著與額勒登保及三省督撫悉
心會商妥爲經理可也